

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

## **KHUTBA JUMMAH**

**HADHRAT MUHYI-UD-DIN AL-KHALIFATULLAH**

**MUNIR AHMAD AZIM**

04 Janvier 2019

27 Rabi'ul Aakhir 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

### **LA SPIRITUALITÉ ET LE MATÉRIALISME**

Ena ene pensée commun parmi nous ki bane Arabes et bane musulmans en général nous spirituels, tandis ki l'Occident, c'est-à-dire bane sociétés industrielles et capitalistes américains et européens, zot matérialiste. Mais à ki point sa affirmation là li vrai?

Parfois, bane pays non occidentale aussi zot inclu dans sa catégorie là, couma Japon et Corée du Sud, par exemple. La plupart de bane pays de l'Europe orientale et de l'Amérique latine zot pas considéré couma bane pays occidentale. D'après plusieurs bane historiens, l'Occident croire plisse dans bane sociétés capitalistes et libérales au lieu de bane cultures socialistes et communistes. Bane termes matérialiste et spirituel zot contradictoires. De toute évidence, ene bon éthique capave trouve sa à la fois dans bane sociétés spirituelles et matérialistes. Spirituel veut dire ki ou attache ou à la foi et à bane valeurs humanitaires, à bane principes de miséricorde et de compassion, à la solidarité sociale et à la croyance ki pou ena ene la vie après la mort.

La spiritualité et matérialisme tous les deux rode le bonheur. La spiritualité rode le bonheur dans le concept global de Dieu et de So Tout-pouvoir, tandis ki matérialisme rode le bonheur sans le soutien de Dieu, kot li abandonne la foi pour

tous kitchoses temporaires ki sa le monde là ena pou offert. La spiritualité enseigne nous pou ena le désir pou rode ene la vie meilleure, pou cherche ene la vie ki pli illuminée. Le matérialisme enseigne nous pou ena envie pou gagne plisse dibiens matériels et bane richesses matérielle, kot alors li faire nous abandonne nous croyance ki ene jour nous pou bizin retourne vers Allah et rende compte pour tous nous bane actions.

Le bonheur permanent et le matérialisme pas capave marche ensam. La spiritualité montrer nous couma pou retire tout l'égo et pou pas intéresse nous à bane kitchoses matérielles. Le matérialisme quant à li, li montrer nous pou vine égoïstes. La spiritualité montrer nous pou content nous prochain. Le matérialisme montrer nous pou content nous richesse matérielle. La spiritualité pas comparer, mais matérialisme li, li toujours sujet à ene comparaison constant, parski li la source, li papa de la jalousie et de l'insécurité si nous capave dire li coumsa ! La spiritualité prend l'aide du progrès matériel, mais li pas vine jamais esclave de bane désirs matérialistes. Le matérialisme li, li pas trouver couma la spiritualité pou capave aider en koique-ce-soit.

La spiritualité vive dans le moment présent. Le matérialisme vive dans le monde de bane désirs sans fin de demain et dans le monde de l'insatisfaction inévitable du passé. La spiritualité ouvert le chemin pou ki l'esprit gagne so tranquillité. Le matérialisme, même avec tous bane richesses du monde, jamais pas pou capave acheter la paix.

Le matérialisme fini par être frustré par so bane propres limites. Doucement doucement, avec hésitation et même à contrecœur, le matérialisme fini par tourne vers la spiritualité pour nourri so l'appétit insatiable d'ene bonheur véritable.

Le matérialisme veut dire ene comportement basé lor le pouvoir, la répression, la concurrence, la politique de marché libre, l'impérialisme, la technologie et le manque de conviction de la religion ou de la vie après la mort, en plus du concept de force concernant la survie de bane ki pli fort. Astaire nous ré-vine lor la pensée commun ki bane Arabes et bane musulmans en général zot spirituels et ki la plupart de bane Occidentales zot matérialistes. Lor ki critère sa l'opinion là li baser?

**La réponse li simple:** Bane Arabes zot bane dimounes religieux ou zot gouverné par la foi, tandis ki l'Occident (généralement parlant) li gouverné par bane l'intérêts matérialistes. Sa zaffaire pou affirmer ki bane musulmans zot gouverné par la religion li capave peut-être vrai, mais nous bizin guetter par ki religion zot pé être gouverné ? Eski c'est par la religion de bane valeurs nobles ou celui de bane l'apparences et de bane fausses rites? Pour sa, nous bizin définir ki été ene vrai musulman et nous bizin précise bane l'aspects Islamiques de bane pays arabes et de zot habitants, si pas bane Arabes pé agir d'après bane l'enseignements de l'Islam ou non. Ene vrai musulman et ene vrai pays musulman, ki guidé par bane la lois Islamiques, en d'autres mots, bane la lois d'Allah, le Quran et bane *Sunnat* (pratiques) de So saint prophète Muhammad (saws) pou sûrement spirituels, kot zot préserve ainsi zot lien avec vraie la foi et Bondié (Allah) Le Tout Puissant et kot zot lutte pour l'au-delà (*Aakhérat*), en laissant derrière zot l'égoïsme et la soif de bane kitchoses matérielles.

Nous pas capave nier ki bane pays arabes zot à l'heure actuelle extrêmement riches et ki la richesse matérielle li accompagné de la tentation et d'ene relâchement de la spiritualité pour adopter le matérialisme et bane désirs matérialistes. Azordi, nous confronté à deux extrêmes de sociétés arabes: kot d'ene côté, le monde Arabe li fine vine trop matérialistes ou bien de l'autre côté trop extrémistes en matière de la foi, à tel point ki bane tel dimounes prend bane mesures bien sévères, au-delà de saki l'enseignements de l'Islam dire, et alors zot contredire bane commandements sacrés d'Allah et kot alors zot invente zot propre définition de la religion/la foi comme étant celui ki authentique (en d'autres mots, saki zot, zot penser de la religion, sa-même ki vrai et zot mette à l'écart bane vrais l'enseignements de l'Islam) et alors zot vine bien dure, bien féroces à l'égard de bane les autres, kot zot projette de sa façon là ene mauvais l'image de l'Islam, alors ki en réalité l'Islam li ene religion de paix, li vrai la foi !

Par exemple, au fil des z'années, nous fine être témoins de saki bane talibans et l'État Islamique de l'Irak et de la Syrie (ISIS) fine faire: kot zot fine donne ene fausse l'image de l'Islam, et kot zot fine accorde plisse l'attention à zot propres perception de l'Islam, et zot bane mauvais rites couma dire ene *eye-wash* (pou montrer lizié dimounes) ki soi-disant saki zot pé fer, c'est sa vrai l'enseignements de l'Islam, et alors sa bane kalité dimounes là fine éloigne zot bien loin même de bane valeurs nobles de la justice, de liberté, d'égalité et de dignité ki l'Islam prêcher réellement.

Dans la plupart de bane sociétés arabes azordi jours, bane relations zot généralement fondé lor l'utilisation du pouvoir, népotisme (c'est-à-dire, kot bane ki au pouvoir favorise zot bane dimounes dans plusieurs façon) et l'intérêt personnel. C'est ene fait réel ki pas capave être contesté. L'argent li ene facteur déterminant dans l'établissement de sa bane relations là. La répression li ene caractéristique de bane nombreux sociétés arabes aujourd'hui (kot zot servi la force pou force dimounes pou pas fer tel ou tel zaffaire). Le pouvoir li ene concept de valeur ki fine être aussi le thème de la majorité de bane poèmes arabes, même bane ki fine composé avant l'avènement de l'Islam. Bane dimounes faibles dans nous société pas pé prend zot compte azordi jour (zis bane riches kot riches protège riches et pauvres paye les pots cassé). Sa bane dimounes pauvres là pas recevoir aucaine soutien de n'importe ki sanlà. Bane groupes minoritaires dans nous sociétés pé souffère beaucoup.

Anou guette l'Ouest maintenant. Eski li vraiment matérialiste? **Si oui, dans ki mesure?**

De manière générale, bane sociétés libres ki pas attaché avec spiritualité et à so l'essence zot appelé à être condamné à long terme. L'Occident, bien ki li matérialiste en grande partie, mais selman li pé tourne li petit à petit vers la spiritualité. Et la meilleure forme de spiritualité ki exister li trouve dans l'ISLAM. Bane dimounes dans bane tel sociétés pé réalise l'importance de la spiritualité dans zot la vies et *Insha-Allah*, mo faire *duah* ki le moment vini kot l'Occident converge vers vraie spiritualité ki l'Islam proposé – et ki constituer la meilleure forme de spiritualité - et de ce fait zot lien avec le Dieu unique, Allah pou alors garanti.

Tandis ki le capitalisme et l'économie de marché libre décide le sort et le destin de so bane habitants, bane Occidentaux (bane dimounes de l'Occident) zot maintenant conscient de sa fait là et zot pé faire zéffort pou change sa situation là. La domination de l'économie de marché pas pé empêche bane dimounes de l'Ouest (l'Occident) pou honore bane valeurs spirituelles et humanistes tel ki la justice, la liberté, l'égalité et la solidarité sociale. C'est ene fait ki nous pas capave nié.

Enfin, si par spirituel ou humanitaire nous pé rode dire la dignité humaine, alors c'est l'Occident ki spirituel et c'est nous (le monde Arabe et bane musulmans) ki matérialistes. Au lieu de bane valeurs de justice et de dignité, le comportement de répression pé prédominer dans nous bane sociétés. Le despotisme fine remplace la dignité et le K-O (chaos/ désordre) fine remplace l'ordre.

Alors maintenant, bane pays musulmans et arabes et tous bane dimounes ki impliqué, nous bizin réfléchi lor sa question là avec soin et change nous destin matérialiste pour celui ki Allah ti fine fini offert nous kan Li fine guide nous vers l'Islam. Nous bizin honore confiance ki Li fine place dans nous et ki fine être transmis à nous par saki Li fine accorde nous : parski certainement l'Islam li la meilleure forme de spiritualité, la meilleure forme de foi ki exister ki pou permette nous pou atteindre Allah (Bondié) par le biyé (à travers) ene moralité et bane valeurs humaines parfait, pour aide nous-même pou atteindre Li (Allah) et pou permette nous pou aide bane les autres aussi pou atteindre Allah, *Insha-Allah, Ameen.*

Ki Allah change le sort de bane musulmans d'aujourd'hui et aide nous pou révine vers le Vrai Islam (*Sahih al Islam*) ki ti exister au temps du Saint Prophète Muhammad (saws) et pou façonne nous bane sociétés couma le Saint Prophète (saws) fine façonne la communauté de l'Islam dans so l'époque. *Insha-Allah, Ameen.*